



REPUBLIKA E SHQIPËRISË
KOMISIONERI PËR MBIKËQYRJEN E SHËRBIMIT CIVIL

Adresa: Bulevardi "Zogu I", Godina 57/2, Nr.18 Tiranë-Albania,

Tel/Fax 04 22268141 ; 22268142

Nr. 532/2 Prot.

Tiranë, më 31. 07.2015

V E N D I M

Nr. 83, datë 31. 07.2015

**“Për disa ndryshime në Vendimin Nr. 23, datë 12.03.2015, të Komisionerit për
Mbiqëqyrjen e Shërbimit Civil”**

Bazuar në nenet 11, 14 dhe 15, të Ligjit Nr. 152/2013, “Për nëpunësin civil”, i ndryshuar, si dhe nenet 121 e vijues, të Ligjit Nr. 8485, datë 12.05.1999, “Kodi i Procedurave Administrative të Republikës së Shqipërisë”,

VËREJ:

Shërbimi Gjeologjik Shqiptar, me shkresën Nr. 1057 Prot., datë 14.07.2015, “Kërkesë për anulim aktesh”, drejtuar Departamentit të Administratës Publike, i ka kërkuar këtij të fundit anulimin e akteve Nr. 1035/3, 1035/4 1035/5, 1035/7 dhe Nr. 1035/11 Prot., datë 07.07.2015, të Revokimit të Statusit të Punësimit për punonjësit ***** , ***** , ***** , ***** dhe ***** , dhe akteve Nr. 1035/1; 1035/2 dhe 1035/12 Prot., datë 07.07.2015, të Deklarimit të Statusit të Punësimit të punonjësve ***** , ***** dhe ***** .

Në vijim të kësaj shkrese, me qëllim evitimin e problemeve sociale, si dhe problemeve në mbarëvajtjen e punës së institucionit, SHGJSH ka propozuar të bëhet përputhja e akteve të deklarimit të statusit të punësimit me pozicionet aktuale të punës, pas ristrukturimit të institucionit.

Departamenti i Administratës Publike, me shkresën Nr. Prot. 3475/1, datë 16.07.2015, “Mbi deklarimin e statusit të nëpunësve të Shërbimit Gjeologjik Shqiptar”, drejtuar Komisionerit për Mbiqëqyrjen e Shërbimit Civil, ka theksuar se nëpunësit për të cilët Komisioneri ka kërkuar revokimin e Aktit të Deklarimit të Statusit të Punësimit dhe ndërprerjen e marrëdhënieve të punës (***** , ***** , ***** , ***** , ***** *****) e kanë filluar marrëdhënien juridike të punës me institucionin Shërbimi Gjeologjik Shqiptar, përpara fillimit të efekteve të ligjit nr. 152/2015, “Për nëpunësin civil”. Për

periudhën nga data e aktit të emërimit deri në fillimin e efekteve financiare, këta punonjës kanë qenë në punë, por nuk janë paguar nga ky institucion për shkak të faktit se kjo periudhë ka përkuar me kohën kur punonjësit që do të lironin këto pozicione, kanë kryer procesin e dorëzimit të detyrës.

Bazuar në sa më sipër, DAP ka kërkuar nga Komisioneri që të marrë edhe një herë në konsideratë statusin që kanë këta nëpunës në shërbimin civil.

Pas rishqyrtimit të dokumentacionit të administruar në dosjen e inspektimit të përgjithshëm, në lidhje me gjendjen e zbatimit të legjislacionit të shërbimit civil, në institucionin e Shërbimit Gjeologjik Shqiptar dhe vlerësimit të shkresave Nr. Prot. 3475/1, datë 16.07.2015, të Departamentit të Administratës Publike dhe Nr. 1057 Prot., datë 14.07.2015, të Shërbimit Gjeologjik Shqiptar, u konstatua sa më poshtë:

1. Punonjësja ***** ka filluar punë pranë Shërbimit Gjeologjik Shqiptar, me shkresën Nr. 228 Prot., datë 24.02.2014, "*Emërimet dhe transferimet në detyrë*", në pozicionin "*Specialist në Sektorin e Gjeofizikës dhe Gjeodezisë*" në Drejtorinë e Gjeologjisë Inxhinierike, Gjeofizikës dhe Gjeodezisë", duke theksuar se marrëdhënia financiare do të fillojë në datë 06.03.2014, pra, pas përfundimit të procesit të dorëzimit të detyrës nga nëpunësi i mëparshëm.
2. Punonjësi ***** ka filluar punë pranë Shërbimit Gjeologjik Shqiptar me aktin e emërimit Nr. 228 Prot., datë 24.02.2014, "*Emërimet dhe transferimet në detyrë*", në pozicionin "*specialist në sektorin e Laboratorit të vetive fiziko-mekanike në Drejtorinë e Gjeologjisë Inxhinierike, Gjeofizikës dhe Gjeodezisë*", duke theksuar se marrëdhënia financiare do të fillojë në datë 06.03.2014, pra, pas përfundimit të procesit të dorëzimit të detyrës nga nëpunësi i mëparshëm.
3. Punonjësi ***** ka filluar punë pranë Shërbimit Gjeologjik Shqiptar me aktin e emërimit Nr. 228 Prot., datë 24.02.2014, "*Emërimet dhe transferimet në detyrë*", në pozicionin "*specialist në sektorin e Analizave të Ujrave në Drejtorinë e Laboratorit*", duke përcaktuar se marrëdhënia financiare fillon në datë 6 mars 2014, pra, pas përfundimit të procesit të dorëzimit të detyrës nga nëpunësi i mëparshëm.

Nga hetimi i fakteve dhe rrethanave të dala rishtas, vërej se, për periudhën kohore ndërmjet aktit të emërimit dhe fillimit të efekteve financiare, këta punonjës kanë qenë në punë, por nuk janë paguar për shkak se kjo periudhë ka shërbyer për realizimin e procesit të dorëzimit dhe marrjes së detyrës, siç përcaktohet në pikën 51 të Kreut VII të VKM Nr. 171, datë 26.03.2014, "*Për transferimin e përhershëm dhe të përkohshëm të nëpunësve civilë, pezullimin dhe lirimin nga shërbimi civil*", në të cilën parashikohet se: "*Dorëzimi i detyrës, i dokumentacionit, i pajisjeve dhe i mjeteve të punës në inventar bëhet, si rregull, brenda 5 (pesë) ditëve nga data e marrjes së vendimit të lirit. Në raste të veçanta, me urdhër të eprorit direkt, ky afat mund të zgjatet edhe me 5 (pesë) ditë të tjera.*".

Për më tepër, nga listëpagesa dhe listëprezenca e muajit mars 2014 rezulton se për të njëjtën periudhë, pra, nga data 24.02.2014 (data e daljes së aktit të emërimit për këta punonjës) deri më datën 06.03.2014 (data e fillimit të efekteve financiare), për të njëjtat pozicione pune, janë paguar personat që i mbanin më parë këto pozicione, për shkak se ishin duke realizuar procesin

e dorëzimit të detyrës përkatësisht tek punonjësit ***** , ***** dhe ***** , duke evituar në këtë mënyrë pagesën e dy personave për të njëjtin pozicion pune.

E parë në këtë kontekst, konstatoj se në rastin konkret periudha tranzitore e dorëzimit dhe marrjes së detyrave nuk duhet të penalizojë dhe të bëhet shkak për të përjashtuar këta punonjës nga përfitimi prej mundësisë që ofron neni 67 i Ligjit Nr. 152/2013, “Për nëpunësin civil”.

Në lidhje me dy punonjësit e tjerë, Flora Progni dhe Dëfrim Mazelli, konstatojmë sa vijon:

1. Punonjësja ***** ka filluar punë pranë Shërbimit Gjeologjik Shqiptar me aktin e emërimit Nr. 234 Prot., datë 24.02.2014, në pozicionin “Specialiste në Sektorin e Dixhitalizimit në Drejtorinë e Gjeoinformatizimit”, duke përcaktuar se marrëdhënia financiare fillon në datë 01.04.2014.
2. Punonjësi ***** ka filluar punë pranë Shërbimit Gjeologjik Shqiptar me shkresën Nr. 228 Prot., datë 24.02.2014, “Emërimi dhe transferime në detyrë”, në pozicionin “Specialist në sektorin e Hartografimit në Drejtorinë e Gjeologjisë”. Në këtë urdhër theksohet se marrëdhënia e punës dhe ajo financiare për këtë punonjës fillojnë me paraqitjen në punë në datë 06.04.2014.

Sikundër vihet re, periudha tranzitore e dorëzimit dhe marrjes së detyrave në këtë rast është më e madhe se ajo e përcaktuar në pikën 51 të Kreut VII të VKM Nr. 171, datë 26.03.2014, “Për transferimin e përhershëm dhe të përkohshëm të nëpunësve civilë, pezullimin dhe lirimin nga shërbimi civil”, të cituar më sipër.

Në këto kushte vlerësoj se Vendimi Nr. 23, datë 12.03.2015, duhet ndryshuar duke u vendosur revokimi i pjesshëm i tij, sipas dispozitivit të këtij vendimi.

PËR KËTO ARSYE:

Bazuar në nenet 14 dhe 15, pika 1, të Ligjit Nr. 152/2013, “Për nëpunësin civil”, i ndryshuar, si dhe nenet 121 e vijues, të Ligjit Nr. 8485, datë 12.05.1999, “Kodi i Procedurave Administrative të Republikës së Shqipërisë”,

V E N D O S A:

1. Të revokoj pikat 8, 9 dhe 10 të Vendimit Nr. 23, datë 12.03.2015.
2. Të kërkoj nga Departamenti i Administratës Publike, që në kuadër të rregullimit të gjendjes së ligjshmërisë në shërbimin civil, të lërë në fuqi aktet e deklarimit të statusit të nëpunësit civil Nr. 1191/60 Prot., datë 14.08.2014, Nr. 1191/65 Prot., datë 14.08.2014 dhe Nr. 1191/1 Prot., datë 14.08.2014, respektivisht për punonjësit e Shërbimit Gjeologjik Shqiptar ***** , ***** dhe ***** , duke kryer të gjitha veprimet e nevojshme administrative.
3. Në rastet kur konstatohet se pozicionet që këta punonjës mbanin në momentin e nxjerrjes së aktit të deklarimit të statusit të punësimit nuk figurojnë më si pozicione të lira, Departamenti i Administratës Publike, në bashkëpunim me Shërbimin Gjeologjik

Shqiptar, të kryejë të gjitha veprimet e nevojshme administrative me qëllim sistemimin e punonjësve të mësipërm në pozicionet e lira të punës, pranë këtij institucioni.

4. Detyrat e përmendura në pjesën urdhëruese të këtij vendimi duhet të përmbushen brenda një afati prej **30 ditësh** nga marrja dijeni e këtij vendimi.
5. Në përfundim të këtij afati, Departamenti i Administratës Publike dhe Shërbimi Gjeologjik Shqiptar duhet të njoftojnë me shkrim Komisionerin për Mbikëqyrjen e Shërbimit Civil lidhur me mënyrën e zbatimit dhe përfundimin e detyrave të lëna.

Ky vendim hyn në fuqi menjëherë.

KOMISIONERI

Pranvera STRAKOSHA